

四庫全書

集部

欽定四庫全書

洛水集卷二十八

宋程秘撰

說

史說

穎濱古史論  
三聖授受

孟子言堯舜禹之終皆薦人於天堯崩舜避堯子於南  
河之南舜崩禹避舜子於陽城天下皆往歸之然後之  
中國踐天子位禹崩益避禹子於箕山之陰朝覲訟獄  
者不之益而之啓故益不得為天子以書觀之恐非孟

子之言也蓋舜禹之攝格于祖考郊祀天地朝見諸侯  
巡守方岳行天子之事久矣及其終而又避之何哉至  
益不度天命而輒受於禹已而天下不歸之然後不  
敢為此匹夫之所不為也而謂益為之哉古史又云堯  
舜傳之賢而禹傳之子後世以是而貶禹此以好異議  
聖人耳昔者湯有伊尹武王有周公而周公又武王之  
弟也湯不以予其臣武王不以予其弟誠以子之才不  
至於亂天下則無事乎授之他人而以為異也故夫堯

舜之傳賢是不得已而已禹之不以天下授益非益不足授也亦非禹私於子也蓋啓足以為天下故也使堯之丹朱舜之商均僅可以守天下則堯肯傳之舜舜肯傳之禹哉是說也蓋亦以常情而窺堯舜禹而不知三聖人之用心均之為公而已矣

孟子說

吾夫子元氣也顏子景星慶雲也孟子巖巖泰山也蓋綏之斯來動之斯和其生也榮其死也哀道冒天下而

人不見春生秋殺而物不知故曰聖人之道大至若孟子治家則家齊治國則國治治天下則運之掌甚至植桑必於牆雞彘必以母織毫靡密無所不察豈非有用之才哉學者當學孟子之人然後可以達於夫子之天

二亭說

一水護田將綠遠兩山排闥送青來此王金陵語也而李同取以命亭夫山水之青綠蓋山水自然之容色也山水有自然之容色事物有自然之理金陵樂山水自

然之容色而不樂循事物之理使一代法制變更畧盡而天下紛然不寧以基宣靖侵陵之變嘻安得謂之樂山之仁樂水之智哉季同坐此亭止此心玩此青綠思天下之大事事物悉有自然之理則萬象容色四時呈露黃河奔放吾盆盎也秦華突兀吾戶庭也金陵之語不能用而為我有矣季同性恬不與物競其進此道也無疑勉之勉之

汪秀才求墨說

柯山汪君以儒名家者乃一日袖太玄君見顧洗硯試之果非凡材也且欲求予之松房雲溪以為墨表溪房安能表哉玄君當自表耳胡不觀颯颯萬桐陰一窅千斛塵肯將石壁博沙金天清露下注黃庭

先君六孫名義說

海于百川盍思所以受之納汙藏垢大吾德也含光發怪寓吾神也出入蛟龍噓噏雲雨章吾化也故字海曰宗源木有本不顛水有源不涸培本深源非養不深非

正不養故字渭曰養源午夜仰觀太空無雲河漢皎然  
人心本明無為物昏惟清乃明惟明法天故字漢曰澄  
源洙泗講學曰孝曰忠曰誠其源正且清一念舍是舛  
其大源故字洙曰正源河水靈長汴實分流蓄大益深  
慶源滋長故字汴曰慶源渥洼水涯神馬所生疑若奔  
風與虹蜺上下顧乃安玉閑行軌道雍容漢天子屬車  
無惟異產而惟淑德則培豐緒衍安所限量故字渥曰  
長源物有斯名也必具斯義也矧人乎佩之與俱無曠



無辱

諸孫名義說

古者父命其子祖名其孫名止一字字止二字二字者助語耳未嘗用兩實字懼其義之不一而佩之不專也回字子淵賜字子貢春秋之時尚守此法至漢則漸變然尚少也魏晉之後則此義不白矣予名字諸子一時失記今不欲易比名諸孫則用古義焉其恕字以行父語曰一言而可以終身行之者其恕乎記禮者曰強恕

而行求仁莫近焉曰其孚字以純父信不中奚其信純乎天德發乎性端則信矣曰其清字以立父果清矣懦夫聞之卓然必忠信行必有廉潔清也詐清非矣曰其厚字以容父容盛德也天惟容也故靡一物之不覆地惟容也故靡一物之不載容則大大則久故曰可久則賢人之德可大則賢人之業厚之時義大矣哉曰其深字以長父源深流必長學問踐履皆所以浚其源也浚則深矣建老曰其元字以仁父元天德也仁天道也天

以一元之氣而運其仁人則體元之仁以成其德故曰  
仁者愛人又曰仁者靜愛以仁人靜以自壽與天為流  
通烏有既邪予在維揚活數萬民兵在閩中欲活數萬  
百姓及其家居則給櫛櫪施絮繒立義廩微矣而未大  
也然大也必權以行之孟氏子之言曰如欲平治天下  
當今之世舍我其誰哉吾夫子則曰如有用我者吾其  
為東周乎眎孟子之言天淵矣

范氏四甥名義說

仲姊歸范氏有四甥長性緩懼其不立故名以震可起  
字之起者勇有行也二性逸懼其不誠故名以巽可敬  
字之敬者順於理也三四皆競爽然皆慮其博而雜散  
而流故名三以艮字之可止止者正也名四以兌字之  
可說說者養也聖人作易一卦具一理一理足萬用衍  
而能伸用不離本斯其為名而已

洺水集卷二十八

欽定四庫全書

洛水集卷二十九

宋程秘撰

贊

有寫陋質者輒自贊之

彼若人兮嘗見之雲溪又嘗見之紅塵今又復見之於  
長松之下是殆與世多違而與天為徒者乎吾將叩長  
松而問之

松之露可以濯松之風可以披胡為乎舍之而亟出懷

之而未歸雖然汝先歸兮其為我謝暘谷之靈茯苓之  
司謹以三年為期期之而違則請峻北山之移

爾紆紫服乃野其衣爾誇從臣乃逸其人欺世盜名有  
若爾之所為者乎噫嘻我知之矣龜蒙之山有猿焉裹  
以裳衣南海之濱有禽焉樂以笙竽方裹方樂子謂何  
心乃野乃逸始還其真嗚呼百世之下必有從予聽雪  
之塢踏月之林者

王直閣寫真贊

精深而不膚直毅而不諛森乎逢掖之秀汪乎山澤之  
矐了不見其為侯門之腴嗚呼斯其為賢相之元子也  
夫

郊祀天光贊

首缺二行

若橫虹蜺若聚金鉦峙丹殿之峩峩照碧瓦之鱗鱗維  
見可睹萬目在廷攷之前聞未傳與經其炎精之盛與  
其明德之象與其天光之下燭與其陽彩之昭回與其  
滅旄頭之應其獲玉章之證如漢元鼎之事與既月謁



謝霜景晏溫都人縱觀四方和會天顏怡愉和氣充塞  
堯稚一辭於斯為盛繼其自今錫祉大來天右序之賢  
和物和朝野賡歌天右序之殘敵其殲三邊沉柝天右  
序之雨暘時若多稔多黍天右序之皇壽以昌皇祚以  
長皇德以彰微臣拜手唯君臣一德天心乃休唯一德  
匪懈天休不已於萬斯年景命有僕

銘

鎮淮飲虹二橋銘

往聞建業與長安洛邑為古帝王更迭建都之地其地  
有鍾阜石城大江天闕之勝欲一游焉紹熙辛亥歲自  
富池汎江凡二十日艤石頭乃陟龍蟠之巔登虎踞之  
城尚羊四望徙倚終日時九月十月之交也雲空天高  
千里一瞬見有水焉其一自西南流其一自西北流合  
千方山以注於江間之則秦淮水也跨水要津有二橋  
焉循水至橋宮碑屹立迫而眎之則澄江邱公辭也其  
後十四年為嘉泰甲子來掌校官事而公亦適縮玉麟

之印於此公宿有海內聲名未至也人攝心側足以俟  
既至也春和風薰因其畏威示以懷柔人益安事益暇  
暇日顧吾府了無一事因念曰秦淮之上所謂鎮淮飲  
虹二橋者得亡恙乎吾昔為從事時所作也吾所為記  
實鉞之石度今圯矣吾志也可不嗣乎乃以全撫授觀  
察推官劉叔向日取材于某石于某甃于某視舊更新  
無所虧增費巨役艱民不與聞五既月工乃成是歲九  
月與次年正月也且洪都滕王閣偉觀也唐中書舍人

王仲舒從事其州也建焉後三十年觀察其州也又修  
焉唐人欣艷作為詞章百世流芳夫閣游觀也矧橋惠  
利斯人乎公獨樂澄江且十年金陵者全吳之藩籬而  
淮甸之腹心朝方起公以為重也有居六蓼者書來云  
淮人頻年凜無固志日東首謀渡江屬聞邱公為江上  
帥始肆志耕桑卧亦安枕嗚呼是豈私相為好者邪一  
得人焉係賴若是司選任之柄者其可苟然邪然則公  
以一身之微居長江之上能為淮人萬里長城二橋顧

足言耶然是特江淮耳使公而位廟堂則四海所恃以  
為奠枕者又將如何邪念頗有志斯世恥為空言者然  
職在庠序他弗與知至於託筆墨紀金石以觀悠久則  
固其分也其何敢與遜乃序而銘焉銘曰

詹彼淮水兩源輸一發華山一東廬匯于方埭乃江趨  
流貫臺城勢紆餘隆然兩圯據津隅朱雀萬歲今遽蔭  
智者創物守者愚一作一述後先俱我堂我修曩所無  
平可轉轂廣方車吞淮跨蜀坦坦涂三邊檄奏萬里書

夜馳晝走康莊衢公抱閤材聳萬夫區區橋梁直錙銖  
推此宏謨磐八區南可關粵西通瀘析木天江海如渠  
胸中長橋隨卷舒唯所巨細用何如青蛇綠字銘翠珎  
詔爾終古繼來譽

延益齋銘

景溫分教金陵作新公宇矣又創一軒扁曰延益以予  
嘗居是官也屬銘焉予為之言曰古之聖賢以道任諸  
已淑諸人未嘗自以為足也其任道也愈重其求益於

人也愈切夫子以天縱之聖集道之成眎當時登門之士何異泰山之於丘垤河漢之於行潦哉而夫子之於二三子也方且以四子為友而若有所資也以六子為侍而若有所缺也然則學問之道寧有窮已哉金陵為東南一都會四方之學者咸萃焉丞相益國周公好賢樂善海內所宗鳴道是邦流風未墜景溫躡其芳躅仰止高山能以虛心務以求益然則並驅前駕夫孰圍諸

銘曰

湯湯秦淮涓涓自岷其行萬里浮日浸雲細流交歸莫  
測其津道源於身實資諸人能遜厥志其積乃盈小智  
自私大惑孰箴巍巍天縱所集大成四友六侍取之其  
門惕若自厲吾道愈尊虛心延益庶幾此意顏何人哉  
希之則是

棣華堂銘

鶉首之月氣方燁有彼儒生云戾止袖中天筆祥雲起  
繼以連編如詩市汎觀夫孰無兄弟乃荆不榮棣不韡



偉哉周氏顧如彼感寤宸衷來天瑞竹木無情皆並峙  
夫豈人力至於此我因拜手窺明旨此扁不獨周氏侈  
要令風化覃遠邇幾比屋皆周氏睠我曾高標義里  
我不敢墜聚千指松阡雙蓮屢呈水僉謂至和鍾殿美  
我聞人心皆天理上天下澤卦為履兄弟天同曾玄異  
同不可異異反是大宗有法官有制別嫌為禮戚疎義  
六經所無意有以若夫睦族尊本始千萬斯年不容已  
曾何九世足云耳

程格之願堂銘

惟復見幾惟靜造理慶雲景星意端所起擾擾萬象孰  
知其真日永堂春內樂恂恂是為願堂之主人

滕縣尉切齋銘

洙泗講學惟一惟精未始汎然一於競名切問近思豈  
其鈎遠如切如磋一皆可踐近世不然脫影遺形豈其  
不的託以自神軻得其傳仁義皆實無垢發之言言可  
則凜然而敬熏然而親不激不誣如準如繩今之學徒

師生皆空背瞬乖離孰守其中吾將疇歸昌黎軻雄

月硯銘

零陵山珍湘潭水靈萬丈青蛭橫截天津匝而固之豫  
我玄經丙申七月十二日銘硯之陰

洺水集卷二十九

欽定四庫全書

洛水集卷三十

宋程秘撰

樂府

水調歌頭

昏發烏江朝至湖  
陰月正午舟中作

玉女掃天淨雍觀掠江寬問君何事底急夜半挾舟還  
三島眠龍驚覺萬頃明瓊碾破涼月照東南碧氣正吞  
吐滿挹漱膺肝烟篷上垂雲象噉天關人間已夢我  
獨危坐玩漫汗螭殿黃昏未鎖鶴氅翩躚蜚下共吸酒

壺乾興罷吹笙去風露五更寒

又

壬子五月二十三日流盃玉泉雨忽大  
作連賦水調二章一書于壁一懷以歸

電闕驅神駿鐵棰起癡蛟木鳴山裂盛夏白晝野驪號  
急上瑤庭深處為問龍君何怒抉破古天河日華開絢  
采雨意屬詩豪與君來飛玉佩斬觚瓢纖流沈羽借  
我萬斛沸銀濤醉拍滿缸香雪寫竭一池濃墨逸氣正  
飄颻何事謫仙子歸去續松醪

其二

日轂金鉦赤雪竇水晶寒支機石下翻浪噴薄出層闕  
半夜雌龍驚走明日靈蛇張甲蜚上石盤桓多謝山君  
護未放醉翁間安得醉風泚泚露珊珊翠雲老子邀  
我瑤佩駕紅鸞一勺流觴何有萬石橫缸如注虹氣飲  
溪乾忽夢坐銀井長嘯俯清湍

又登甘露寺多景樓望淮有感

天地本無際南北竟誰分樓前多景中原一恨杳難論  
却似長江萬里忽有孤山兩點點破水晶盆為惜鞭霆

力驅去附崑崙 望淮陰兵治處儼然存看來天意止  
欠士稚與劉琨三拊當時頑石喚醒隆中一老細與酌芳  
罇孟夏正須雨一洗北塵昏

又  
戊戌  
自壽

渤澥東南界西北倚崑崙當時推步但知宇內有乾坤  
午夜風輪微轉駕我浮空汎景一息過天垠俯眎人間  
世渺渺望漚塵 挽天吳摩海若吐還吞寧用計年八  
十陽九又三陰要自白榆星外直至黑流沙底山與澤

俱平不論初未度一色界如銀

六州歌頭

送辛稼軒

向來抵掌未必總談空難徧舉質三事試從公記當年  
賦一邱一壑天鳶闊淵魚靜莫擊磬但酌酒儘從容一  
水西來他日會從公曳杖其中問前回歸去已笑白髮  
成蓬不識如今幾西風 蒙莊多事論虱豕推羊蟻未  
辭終又驟說魚得計孰能通嘆如雲罔罟龍伯啖眇難  
窮凡三惑誰使我釋然融豈是匏瓜者把行箴悉付鴻



濛且從頭檢校想見迎公湖上千松

滿江紅

龔撫幹示  
閏中秋

黃鶴樓前江百尺波橫光溢問老子當年高興何人知  
得寂愛洞庭天際水分明表裏玻璃色恐今宵未必似  
前番天應惜都莫問鴻鍾勒也休羨壺天謫憶故人  
霜下亂灘橫笛便好騎鯨游汗漫古來蟾影何曾沒更  
明年重約再來時垂槎客

又

登石頭城  
歸已月生

頗恨登臨浪自作騷人愁語石城上何須苦說死袁生  
褚當日卧龍商畧處秦淮王氣真何許與君來蕭瑟址  
風寒黃雲暮枕鍾阜湖玄武生此虎真蹲踞看四山  
環合休臨江渚可笑唐人無意度却言此虎凌波去君  
且住明月為人來潮生浦

八聲甘州

別陳  
總帥

玉局仙人輕帆萬里送入三吳恠一舟如葉元無濁物  
依然姑射滿載冰壺昔日文君千言成誦不識如今記

得無新來也喜都將分付一顆驪珠  
向來田賦蠲輸  
散多少春風已與渝算公家粗了尊鱸而已何妨西子  
白髮江湖印鑄黃金時來須佩畢竟人生萬卷書離情  
處正秦淮歲晚雪意糝糊

步虛詞

壽張門司

休怪頻年司鑰仙官長守仙宮東風未肯到凡紅先舞  
雲韶彩鳳 都是一團和氣故教上苑春濃羣仙拍手  
過江東高唱紫芝新頌

沁園春

壽王  
運使

公有仙姿蒼松野鶴落落昂昂論法主長生仍須極貴  
雲臺絳闕都許尚羊更憶當年而今時候一念功名下  
帝旁天分付使人間草木盡有春香 人知相法竒龐  
又那識陰功事更長算毗陵荒政江東風采忠文典則  
凜凜生光再歲秦淮觚稜入夢帷幄從來在廟堂公歸  
去好平心獻替人望時康

又壽李  
通判

那用招秋休言推暑風自薰兮問誰解當初識公來處  
月明碧落旆卷青霓千丈長松起人生意凍芋寒瓜空  
滿畦還堪怪怪諸公袞袞我尚憑泥 須教一舉崔嵬  
算人世功名各有梯更何須煉鼎玄霜絳雪只煩煮茗  
水餅冰蘂紫府多仙招來滿座公自長生角亢齊何曾  
也有玉麟行地老鳳梧棲

又

謝劉小山  
頻寄所作

君有新詞何妨為我時遣奚奴看此山大小風流晉宗

眼中餘子苦自侏儒九曲清溪千枝楊柳還記新條更有無春將好欲從君商畧君意何如 佳人玉佩瓊琚更胸中澆灌有詩書把古人行處從頭檢點今人說底却不須渠更上石頭重登鍾阜畫作金陵攷古圖頻相見怕薰風早晚便隔天隅

又

庚午三月望日  
賦椿堂牡丹

消得凋欄也不枉教車馬如狂怪元和一事韓公子者歸來斲去玉毀崑岡為解花嘲朝來試看采佩殷霞浥

露香君休怪，算只緣太艷，俗障難降。詩人未易平章，向百卉彫零，獨後裝看。洪爐大器，從來成晚，只須這着也。做花王，況是月坡花園一尺，壓盡紛紛瑣細，芳還堪笑笑。龍鍾老鳳，方入都堂。

又讀史記有感

試課陽坡春後，添栽多少杉松。正桃塢晝濃，雲溪風軟，從容延叩太史丞公。底事越人見垣一壁，比過秦關，遽失瞳江神吏。靈能脫畧，不發衛平蒙。休言唐舉無功。

更休笑丘軻自阨窮  
算汨羅醒處元來醉裏真教假孟  
畢竟誰封太史亡言床頭釀熟人在晴嵐香靄中新堤  
路喜樛枝鱗角天矯蒼龍

錦堂春

留春

寂是元來苦無風雨只恁匆匆歸去看遊絲都不恨恨  
秦淮新漲向人東注 醉裏仙人惜春曾賦却不解留  
春且住問何人留得住怕小山更有碧蕪春句

壺中天

壽邱  
樞密



日躔東井正輪囷桂影十分光潔火令方中符國運天  
與非常英傑瑩瑩平生眼空宇宙綠髮千尋雪笑談一  
鎮單于底事心懾 晚歲佛地功深人間富貴五湖烟  
濶誰遣心期事左須酬滿麒麟勛業又何妨長生仙  
錄已在黃金闕中原恢拓要公歸任調燮

燭影搖紅 元宵

青旆搖風朱簾漏月黃昏早蓬山萬疊忽蜚來上有千  
燈照和氣祥烟繚繞映瓊樓五雲縹緲青裙縞袂亂吹

繁絃九衢驩笑 元是琴堂十分管領春光到手移星  
宿下人寰招客來仙島信道邦人見少彷彿似皇都春  
好明年只恐鰲山扈從隨班清曉

謁金門

用趙帳  
幹韻

烟漠漠醉裏看春都錯過了清明遲一着牡丹重約摸  
曉日漸明簷角天與芳辰難却駐得韶華元有樂桃  
源誰共約

水龍吟

壽李  
尚書

道家弱水蓬萊鯨波萬里誰知得人間自有南昌居士  
仙風道骨詩似白星兒如聃老風塵挺出向謫仙家裏  
滕王閣畔飄玉佩下丹闕黃髮四朝元老又誰知重  
生綠髮手提一筆活人多少三千功績已冠文昌人人  
瞻望玉樞躔偏對新涼酒頰微紅宛是一星南極

喜遷鶯

別陳  
新恩

少年意氣但投鞍盤羽結場奪槩眼底矇矓腹中空洞  
不著曹劉元白聞道殊科八中也要彩盧連擲收拾盡

到如今但有寸心如鐵  
天付真奇特口靜神充雙眼  
西僧碧楚國離騷唐朝詞學未信芳塵歇結取佳人香  
佩截斷兒曹綺舌歸去也且爛斑戲采好春長日

又

壽李  
文昌

評君誰似似長松千丈離竒多節骨瘦稜稜文高聲聲  
今日來仙闕走卒識公容貌邊徼問公官闕更史館一  
編書多少頻添勛業  
偉絕今歲別新綠名孫又見枝  
生葉底事七旬雙瞳如水畢竟桂花方發賜第彤墀秋

早又一瑤樞光潔故人也念相逢誰似鳳池同列

又壽薛  
尚書

一天風露喜初行彈壓人間殘暑金母此時雲輶先降  
又見樞星光吐人道鴻濛逢日可是東方明處更天上  
走玉人絡繹儀鸞瓊醕聽語更希舉試把皇朝盛事  
都來數當日鰲頭皇扉侍母綠髮方瞳更有飛鳧王季  
往往文星再聚渾休問但回班千歲貂蟬成譜

又壽薛  
樞密

去年玉燕記曾期今歲瑤光入度今日都人從頭屈指  
盡是黑頭公輔爭道一朝語合誰信千齡際遇更積雨  
曉來晴洗出琉璃秋字 笑語知何許旆卷青霓來自  
鈞天所道骨仙風安排頓着須是人間紫府要識雲臺  
高絕更有鳳池深處從今數看千秋萬歲永承明主

柳梢青

壽薛尚書

官已尚書人猶寒素仙有名言謂是若人法當至貴仍  
主脩年 唐人四字鮮妍堪照映畫堂綵烟更對新涼

一聲芝曲萬斛金甌

又

和齊仙  
留春

嫩綠成堆朝來紅紫都在莓苔方見春來又聞春去暗  
裏誰催 人生易老何哉春去矣秋風又來何似雲溪  
長春日月無去無歸

醉江月

丙子  
自壽

平生有意把六經膏澤人人需受白被子明康節輩浪  
說乘除先後遇合一時英雄千古誰是高强手蹉跎歲

晚臨風浩然搔首  
今但入夢青山雲溪深處烟月生  
懷袖宿有十年蕭散願此段功緣須就因憶坡公仇池  
有約莫悞歸時候今朝對酒歌此與君為壽

賀新郎

壽李  
端明

袖手雲溪上看人間紛紛饑烏腐鼠觸蠻交戰便得金  
魚垂玉帶多少雌黃點勘算此語必非河漢直自彈冠  
班八座更青春數到期願莫一段玉無纖玷公難學  
處尤堪羨全似泠泠秋水體清形健袞處從來高一著



那肯隨人脚轉要須是常見乾坤清晏天意未教公猛  
去要都俞了却從公便歌壽筭朱簾捲

寶鼎現

壽李  
端明

綠楊欲舞紅杏微笑春工漸侈試儂指自從嘉定數到  
寶慶裡無一歲不書年大有問元功誰變理於變雍熙  
如此自當千歲 況是端笏蓬萊陛但看雍容玉立山  
峙煉五色補天無跡扶日天衢光四被安清祗填羣心  
聲色恬然如談笑耳更八荒民生奠枕此著又當千歲

又况善述先猷嚴武備不開邊鄙陰功徧南北千歲  
未多疇祉且說總是三千歲此際方岐嶷聽今日處處  
笙歌何止南樓十二

念奴嬌

憶先廬春山之勝

歸來一笑尚看看趁得人間寒食阿壽牽衣仍問我雙  
鬢新來添白忍見庭前去年芳草依舊青青色西湖雨  
後綠波兩岸平拍天教斷送流年三之一矣又是成  
疎鬲燕子春寒渾未到誰說江南消息玉樹熏香水桃

翻浪好箇真消息山間景物這回歸去松風深處橫笛

又

初見海棠花

嫣然一笑向燭花光下經年纔見欲語還羞如有恨方  
得東君一盼天意無情更教微雨香泪流丹臉今朝霽  
色笙歌初沸庭院因是思入東屏當年手植徧桃源  
低岸失脚東來春七度辜負芳叢亡限問訊園丁寧如  
歸去細與從頭看東風獨立白雲遮斷雙眼

傾盃

丁亥自壽

臺殿秋深玉堂宵永千門人靜問天上西風幾度金盤  
光滿露濃銀井碧雲飛下雙鸞影迤邐笙歌近笑語羣  
仙隱隱更前問訊墮在紅塵今省 漸曙色曉風清迥

更積靄沉陰都捲盡向窓前引鏡看來尚喜精神炯炯  
便折簡浮邱共酌奈天也未教酩酊來歲却笑羣仙月

寒空冷

予家天都山乃  
浮邱針仙之地

醉蓬萊

壽王  
司直

算千葩百卉誰伴東風早春時候唯有江梅在人間長

久雪後霜前衝涉多少尚精神如舊歲歲年年醪酥飲  
了便為公壽 更向尊前席上細看人與梅花稜稜爭  
瘦桃李漫山都落芳塵後和氣滿身參調玉鉉表天然  
孤秀來歲今朝星闈霧閣一卮春酒

又

丙申  
自壽

記蟾宮桂子撒向人間如今時候白下長干亂灘橫笛  
想昔遊依舊大海一漚千年一息誰稱彭壽 開徧門  
前丹蕊漸西風入東籬釀成仙酒卓筆雞籠懸天寶蓋

占斷宣徽秀來歲清苔公家事了斑衣藍綬

西江月

壬辰  
自壽

天上初秋桂子

今歲七月  
月中桂子下

庭前八月丹花一年一度

見仙槎秋色分明如畫  
願把陰功一脉燈燈相續無  
涯降祥作善豈其差永作漁樵嘉話

又

癸巳  
自壽

底事中秋無月元來留待今宵羣仙拍手度仙橋驚起  
眠龍天矯天上靈槎一度人間八月江湖西興渡口

幾魂消

癸丑八月  
侍親西興

又見潮生月到

滿庭芳

雪登前嶺自己酉江右雪行彌月  
四十七年無此樂也今再見之

未歲嘉平初旬日四雪中歸自崇唐山林湖海一氣接

蒼茫踏盡玉龍千丈更一望龍尾天長須臾上高峯四

顧迤邐過前岡羣山如玉削松林百萬盡傳瓊霜渾

疑是天際一鶴翱翔人道玉皇三六欲一叩風力方剛

明朝好金烏銜燭八表散祥光

又

戊戌上元喜  
霽訪開桃洞

去臘飛花今春未已迤邐將度元宵俄然甲子青帝下  
新條淨掃一天沉靄紅輪滿大地山河從今好便當聽  
取萬國起歌謠 有人當此際鉏雲深塢剪月中阿已  
占斷春風自種仙桃更扶疎桂影直從巖底上拂雲梢  
仍為我長摩蒼石無負此清宵

又

戊戌  
自壽

人道蒼姬燠多寒少故教千歲綿綿算來春夏一氣本  
無偏底事今年玉歷秋未朔風露冷然君知否山深地



僻自是早霜天 如今當此去十分親切面問嬋娟何  
須看仙槎海上重還好 在金英玉屑為我滿汎金船仍  
傳語橫江秀石永鎖三川

減字木蘭花

不應雙睫看盡人間花與雪 曾是當時一朵紅雲擁日  
飛 如今正好萬綠千紅深處坐也 使春工喚作天池  
五月風

洛水集卷三十